



Pamantalaan sa Rebolusyonaryong Kalihukan -Central Visayas

# PAKIGBISOG

Ispesyal nga Isyu

Oktubre 17, 2000

Usa ka Hinanaling Panawagan sa NDFP-Sentral Bisayas ngadto sa Katawhan

## Maghiusa ug Molihok alang sa Dinaliang Pagpalagpot sa Rehimeng EU-Estrada!



**A**ng labing bag-ong mga panghitabo nga miresulta gikan sa pagbutyag ni Ilocos Sur Gov. Luis “Chavit” Singson kabahin ni Erap Estrada isip maoy agalon sa tanang agalon sa sugal nga “jueteng” sa Pilipinas, nakapatin-aw pagayo sa usa ka punto: ang isyu karon alang sa tanang misalikway ug nakigbatok sa kontra-katawhan, maki-imperyalista ug pasistang kagamhanang Estrada mao ang paghimo og mahukmanong lakang alang sa dinaliang pagpalagpot niining dunot nga pangagamhanan.

Nailang Erap o Asiong Salonga sa sayong bahin sa iyang pagka-aktor ug sa talaan sa suholan sa iyang “jueteng accountant”, nahimong daw usa ka mangil-ad nga damgo ang kinabuhi sa katawhang Pilipino ilawom sa iyang kapangulohan! Ang labaw sa duha na ka tuig nga rehimeng US-Estrada, usa ka gobyernong puno sa korapsyon, kroniismo, mga pagsaka sa presyo sa lana, Minarcos nga pagpanglupig sa katawhan, ug wala sukad mahitabong pagguba sa ekonomiya. Klaro nga si Erap maoy responsable sa gigrabehon ning kasamtangang katilingbanong krisis.

Bug-at, bag-o ug dili malalis ang ebidensya sa dinagkong pagpanikas ug pagpangawkaw ni Erap. Dili na maagwanta ang kalisud ug kasakit nga gihatag niini ngadto sa katawhang Pilipino. Ug magpadayon kini kon ang mga kaanib ni Estrada padayong maghupot og pulitikanhong gahum.

Ang pagtinabangay ug panaghiusa tali sa tanang patriyotiko ug progresibong pwersa nga buot motapos sa rehimeng Erap labing gikinahanglan karong panahona. Ang Partido Komunista sa Pilipinas (CPP), Bag-ong Kasundalohan sa Katawhan (NPA), Nasudnong Demokratikong Prente (NDF) ug ang rebolusyonaryong masa sa Sentral Bisayas lig-ong nanawagan alang sa labing lapad nga panaghiusa ug pagtinabangay aron dugang nga mapaduso ang mga batakang demokratikanhon ug nasudnong tinguha sa katawhan.

Ang pagpalagpot kang Estrada kabahin ug kakuyog sa rebolusyonaryong pakigbisog aron lumpagon ang sistemang alang-alang kolonyal ug alang-alang pyudal. Kabahin kini sa nagpadayong proseso sa pagpalagpot sa matag reaksyunaryong rehimen aron makatigum og rebolusyonaryong kusog ug iandam ang dalan ngadto sa hingpit nga kadaugan sa demokrati-kong rebolusyon sa katawhan.

### Rehimeng anaa sa tumang pagkahimulag

Si Erap mismo ang hinungdan sa kasamtangang krisis sa iyang paghari. Mihait ang krisis sa nagmandong hut-ong tungod sa iyang pag-angkon og tanang posibleng gahum ug bahandi alang sa iyang kaugalingon, sa iyang daghang pamilya, gagmay'ng pundok sa mga kroni, ug sa iyang mga kainom ug kauban sa sugal ug binuhatang kriminal. Kining iyang tumang kahakog nagtukmod kaniya sa pag-salikway bisan sa pipila niya ka dumadapig, ug sa proseso mipugos kang Chavit Singson sa pagbutyag sa iyang mafia sa sugal. Ang gitawag karon nga “juetengate scandal” tataw nga mimugna og hait nga panag-away

sulod mismo sa nagmandong hut-ong. Miresulta kini karon sa mas lawom ug mas lapad nga pagkabahin-bahin sulod sa burukrasyang sibil ug militar.

Apan ang labing dako nga hinungdan nga maoy nakapadako sa iskandalo sa jueteng mao ang pagkahilabihang-kaitoy sa rehimeng Estrada ngadto sa mga diktar sa imperyalistang US, grabeng kalisud sa masang mag-uuma ug uban pang kabus, pasistang pagmando ug dayag nga pagpangawkaw. Sulod lamang sa hamubo kaayong panahon, paspas kining nakamugna og kontra-Estradang baruganan sa lainlaing hut-ong, ug mimugna og mga kondisyon alang sa pagpasulong sa anti-imperyalista, anti-pyudal ug anti-pasistang pakigbisog sa katawhan. Ang pagpadayon sa maong mga palisiya nakahatag og mas dakong kahingawa sa nagkagrabeng krisis sa alang-alang kolonyal ug alang-alang pyudal nga sistema. Miresulta kini sa nagkadakong utang nato sa gawas sa nasud, nagkataas nga balayranan sa buhis, nagkadakong pagkaalkansi sa badyet sa gobyerno, paggrabe sa subling pagpang-akop-akop sa kayutaan, dakong pagpakunhod sa badyet alang sa edukasyon ug panglawas, ug sa usa ka mapig-utong kahimtang bisan og walay tinong pagdeklarar sa martial law.

Ubos sa nagkagrabeng katilingbanon ug ekonomikanhong krisis sulod sa miaging duha ka tuig, migamay og samot ang wanang sa panagkompetensya-ay tali sa lainlaing mga grupo sa nagmandong hut-ong. Mao nga wala na malikayi ang ilang mas grabeng panag-away. Ang gikolektang tong sa “jueteng” kabahin lamang sa taas nang daan nga listahan sa pagpanikas, pagpangawkaw ug uban pang kriminal nga binuhatan sa hakog nga pundok ni Erap. Sa samang higayon, nakapaaghat kini sa agrabiyadong pundok sa nagmandong hut-ong nga maghiusa ubos sa kontra-Estradang nagkahiusang prente kon diin ang lubas ug ang pinakadaghan niini naglangkob sa masa sa militante ug rebolusyonaryong mamumuo ug mag-uuma.

#### **Pagpalig-on sa kontra-Estradang nagkahiusang prente**

**M**ahitabo usab ni Erap ang makauulaw nga gidangatan sa iyang magtutudlo sa pulitika nga si Marcos. Napulo ka libo-ang katawhan sa Sentral Bisayas ang mobangon ug makig-away batok niining dunot nga rehimen, ug makighiusa sa minilyon ka katawhan sa tibuok nasud aron palagpoton si Erap gikan sa Malakanyang.

Ang tumong sa kontra-Estradang nagkahiusang prente sulod niining kritikal nga kahimtang mao ang pagpalambo sa tanang paningkamot nga mopalihok sa minilyon ka mga Pilipino diha sa hiniusa ug militanteng mga aksyon aron tapuson ang paghari ni Erap. Kadungan niini, ang mga rebolusyonaryo ug makinasadnong pwersa sulod ning halapad nga kalihukan kinahanglang maningkamot nga batokan ang daghang mga kontra-katawhan ug maki-langyaw’ng palisiya ni Erap. Lakip niini ang wala pagpatuman sa tinuod nga reporma sa yuta, ang paglansang sa ubos nga suholan sa mga mamumuo ug empleyado, ang hingpit nga liberalisasyon sa pamatigayon, ang kontra-katawhan ug kontra-Bangsamorong opensibang militar sa Mindanao ug ubang bahin sa nasud, ug ang Visiting Forces Agreement (VFA). Kinahanglang ipadayon sa rebolusyonaryong kalihokan ang mga kontra-imperyalista, kontra-pyudal ug kontra-pasistang pakigbisog aron dili mapadaplin ang mga batakong interes sa katawhang linupigan.

Ang rebolusyonaryong kalihukan sa Sentral Bisayas maningkamot aron malunsad ang nagkadaiyang hiniusa ug koordinadong mga lihok protesta. Maningkamot usab kini aron tukoron ang lainlaing pormal ug dili pormal nga panaghiusa nga momugna og dagkong mga lihok protesta sa siyudad, probinsya ug rehiyon nga panapanahon kadungan sa mga paningkamot sa nasudnong ang-ang. Ang tanang rebolusyonaryong pwersa kinahanglang mokabig sa labing dakong bahin sa impluwensyal nga mga personalidad ug lain-laing organisasyong sektoral; sulod sa simbahan, inila ug makanunayong kontra-Erap nga mga pulitiko, mga estudyante ug



***ang isyu karon alang sa  
tanang misalikway ug  
nakigbatok sa kontra-  
katawhan, maki-  
imperyalista ug pasistang  
kagamhanang Estrada  
mao ang paghimo og  
mahukmanong lakang  
alang sa dinaliang  
pagpalagpot niining dunot  
nga pangagamhanan***

magtutudlo, mga propesyonal, mga empleyado sa gobyerno. Kinahanglan niining aboton ang mga pabrika, tulunggaan, opisina, komunidad, simbahan ug uban pang lugar aron magkadaghan ang mosalmot sa mga tigum, rally, ug uban pang mga kalihukan diin sila mismo mopadayag sa ilang kayugot sa kagamhanang Estrada.

---

***Ang pagpalagpot kang Estrada kabahin ug kakuyog sa rebolusyonaryong pakigbisog aron lumpagon ang sistemang alang-alang kolonyal ug alang-alang pyudal. Kabahin kini sa nagpadayong proseso sa pagpalagpot sa matag reaksyunaryong rehimen aron makatigum og rebolusyonaryong kusog ug iandam ang dalan ngadto sa hingpit nga kadaugan sa demokrati-kong rebolusyon sa katawhan.***

---

### **Pagbantay batok sa kontra-rebolusyon**

Samtang nagkalig-on ang halapad nga panaghiusa sa katawhan batok sa kurakot, malupigon ug kontra-katawhang rehimeng Estrada, kinahanglang padayong magmabinantayon sa lihok sa mga nagpaka-aron-ingnong rebolusyonaryong grupo. Sama sa miagi, siguradong maningkamot ning mga gamatoy'ng grupo nga makakawat og eksena aron mopabugnaw sa mga pakigbisog sa masa ug mopasimang niini ngadto sa kapildihan. Kinahanglang padayon natong huptan ang palisiya sa Partido batok sa bisan unsang porma sa panaghiusa tali ning mga mining rebolusyonaryo.

Mahinungdanon nga sa kanunay ibutyag ang ilang dunot ug dautan nga mga binuhatan ug batokan kining mga gagmay'ng kontra-rebolusyonaryong grupo nga sa kanunay nagsilbing ispesyal nga ahente sa imperyalismong US.

### **Rebolusyonaryong integridad ug inisyatiba**

Atong kutloon ang editoryal sa *Ang Bayan*, opisyal nga pamantalaan sa Partido Komunista sa Pilipinas sa isyu niini niadtong Mayo-Hunyo 2000, sa pagtubag sa pangutana sa rebolusyonaryong integridad ug inisyatiba sulod sa anti-Estrada nga nagkahiusang prente:

“Tino sa Partido nga ang pagpalagpot sa rehimeng US-Estrada wala magkahulugan og rebolusyonaryong kausaban. O sa laing pagkasulti, ang hingpit nga katumanan sa atong rebolusyonaryong tinguha dili mahitabo diha sa pagpalagpot kang Estrada. Hinuon, kining maong proseso sa pagpalagpot kang Estrada makaabli og paborableng kahigayonan alang sa dakong pag-abante sa rebolusyonaryong kalihukan. Mao nga ang Partido ug tanang rebolusyonaryong pwersa kinahanglang maalamong molihok aron dugang nga mahiusa ang

katawhan ug mapakusgan ang mga masang pakigbisog alang sa pagpalagpot sa rehimeng US-Estrada.”

“Samtang gipalapad ug gipalig-on ang kontra-Estradang nagkahiusang prente, ang mga rebolusyonaryong pwersa kinahanglang mopadayon sa pagpatuman sa ilang inisyatiba ug mohimo og mga lakang sa pagpalig-on kanila. Kinahanglang buhaton nila ang tanang-bahing pagpalig-on sa ilang kaugalingon aron dugang isulong ug pakusgon pa ang rebolusyonaryong pakigbisog.”

Ang kalihukan sa pagpalagpot kang Estrada siguradong mopukaw og gatasan o bisan libo-an ka mga patriyotiko ug demokratikong lider ug pwersa nga sa unahan kusganong mopasulong sa pakigbisog, dili lang alang sa hinanaling pagpalagpot sa rehimeng US-Estrada, kun dili sa pagkab-ot sa pipila ka nasudnon ug demokratikong pangandoy sa katawhan. Dugang kining mopalig-on ug mopalapad sa mga kadaugan sa katawhan diha sa kontra-imperyalista, kontra-pyudal ug kontra-pasistang mga pakigbisog ug sa ngadto-ngadto makatampo sa kinatibuk-ang kadaugan sa nasudnon demokratikong rebolusyon.

### **Adunay Dakong Kahigayonan Alang sa Dugang Pagpasulong sa Rebolusyon**

Mokutlo kita'g balik sa editoryal sa *Ang Bayan*:

“Labaw sa tanan, ang Partido ug mga rebolusyonaryong pwersa kinahanglang mosakmit sa bentahang gianak sa krisis sa nagharing hut-ong. Angayan niining pakusgon ang mga armadong taktikal nga opensiba, iduso rebolusyong agraryo, palapdon ang

rebolusyonaryong baseng masa, ug palapdon ug palig-onon ang Partido, Pulang Kasundalohan (NPA) ug Pulang demokratikong gahum sa kabanikanhan.”

Ang Arnulfo Ortiz Regional Operational Command sa NPA mahimo ug angay molunsad og piniling mga armadong taktikal nga opensiba ug uban pang aksyong militar aron silotan ang mga lunod-patay’ng tigpatuman sa mga kontra-katawhang binuhatan sa rehimeng US-Estrada. Lakip usab sa mahimong target niini ang kauban ni Erap sa *jueteng* ug uban pang sugal ug krimen, ug kadtong nangikik o midawat og dagkong suborno gikan sa mga proyektong gipondohan sa mga imperyalistang nasud nga nakapadislokar sa libo-an ka mga katawhan ug nakaguba sa daan nang nagkagusbat nga kinaiyahan sa rehiyon.

Sa pagpadayon sa editorial sa *Ang Bayan*:

“Samtang dugang nagkalig-on ang rebolusyonaryong kalihukan, nagkalig-on usab ang iyang posisyon sulod sa kontra-Estradang nagkahiusang prente.

Kining kalamboan makatampo usab sa dugang pagpalig-on sa nagkahiusang prente ug sa kapasidad niining hiusahon ang katawhan ug pandayon ang ilang dili-mabuntog nga kusog aron tapuson ang rehimeng US-Estrada.”

### **Paglantaw ngadto sa panahon nga wala na si Estrada**

Niadlong miaging Oktubre 10, ang nasudnong tigpamaba sa Partido Komunista sa Pilipinas (PKP) nga si Gregoria “Ka Roger” Rosal mipagawas og pamahayag nga giulohan og “*Kinahanglang palagputon si Estrada gikan sa poder ug dili pasagdang makaikyas sama ni Marcos.*” Matod pa ni Ka Roger:

“Sa bisperas sa pagpalagpot kang Estrada, mahimong ipatawag ang usa ka nasudnong konseho nga langkuban sa mga representante sa nagkalain-laing makinasudnon ug demokratikong grupo ug personaheng kontra-Estrada. Mahimo kining maoy temporaryong modumala sa katungdanang panggubyerno hangtud nga mahiusahan sa maong konseho ang pamaagi sa pagtukod sa bag-ong kagamhanan.

Ang pagpalagpot ni Estrada seguradong makaayo sa katawhang Pilipino ug makahatag og kahigayonan nga matubag ang ilang mga demokratikong demanda, lakip na ang mosunod:

1. ang hinanaling pagrolbak sa presyo sa mga produktong petrolyo;
2. ang makatarunganong pagpataas sa suholan sa mga mamumuo;
3. ang pagpakunhod sa presyo sa nag-unang mga palaliton;
4. ang paghunong sa padayong pagsubasta sa mga pangpublikong kabtangan, ilabina sa mga ospital ug iskwelahan;
5. ang pagpahunong sa kontra-Bangsamorong gubat sa Habagatan ug Kasadpang Mindanao;
6. ang pagbasura sa Oplan Makabayan; ug
7. ang pagpagawas sa tanang gibilanggo tungod sa ilang pulitikal nga binuhatan.

Andam ang Partido Komunista sa Pilipinas (CPP) ug National Democratic Front of the Philippines (NDF) nga subling ilunsad ang panagsabot-sabot alang sa kalinaw tali niini ug sa bag-ong Gubyerno sa Republika sa Pilipinas (GRP) nga mupuli sa rehimeng Estrada. Kinahanglang manukad ang maong panagsabot-sabot diha sa gambalay sa pagpatuman sa mga pinirmahang nang mga kasabutan, gikan sa Hiniusang Kasabutan sa The Hague Joint Declaration niadtong 1992 hangtod sa Komprehensibong Kasabutan alang sa Pagrespeto sa Tawhanong Katungod ug Internasyonal nga Makitawhanong Balaod niadtong 1998.”



**National Democratic Front**  
**Tunga-tungang Kabisay-an**  
17 Oktubre 2000



***Ang Arnulfo Ortiz Regional Operational Command sa NPA mahimo ug angay molunsad og piniling mga armadong taktikal nga opensiba ug uban pang aksyong militar aron silotan ang mga lunod-patay’ng tigpatuman sa mga kontra-katawhang binuhatan sa rehimeng US-Estrada.***